

Saturday, April 19, 2025

Time - 2:30pm - 2:35pm

REGIONAL NEWS BULLETIN

(MIDDAY)

LIQUOR SEIZED

Mizoram Excise and Narcotics Department in Aizawl khawpuia hotel leh restaurant hrang hrang dan lova zu leh a kaihhnawih zuar nia rinhlelh an enfiah na ah hmun nga (5) atangin zu tam tham tak man a ni.

Excise in zu an manna hmun te hi : - Falkland venga hmun 3 – Buzz Inn, Chopstyx, leh Hot Pot Grace Restaurant te an ni a, heng bakah hian Thuampui Vengthara Silverspoon Restaurant leh Thuampui-Falkland Junction-a Heritage Lounge Karaoke atangin zu leh a kaihhnawih thahnem tak man sak niin MLP Act hnuaiah thubuai ziah luh a ni.

Excise in Zu leh a kaihhawih an man te hi sap zu leh beer thahnem tak bakah Rakzu litre 37 leh plastic bottle 37 te an ni.

Hetihlai hian tunkar ningani khan Kolasib District chung Phaisen Police Outpost a duty te chuan lirthei pakhat atangin India siam Sap Zu (IMFL) Case 8 leh Beer Case 3 an man a, Vairengte Police Station ah thubuai ziah luh niin, Court thupek angin Driver hi District Jail-ah dah luh nghal ani a, Zu leh Beer hi Court Malkhana ah dah luh ani bawk.

Thudawn danin, he Truck hian Silchar atangin Aizawla dah tur plastic bungrua thahnem tak a phur a, bungraw karah Zu hi man in, Zu hi Aizawl Veng pakhat a dah tura a phurh ni a hriat a ni.



ZORAMTHAR PRESS CONFERENCE

Zoram Thar Zofate Lairelna Inpui chuan karleh thawhtanni ah Zofate Pathian Biak Inpui sakna tur atan ban phunna hnatlang a ko.

Zoramthar chuan vawiin khan Aizawl Press Club ah chanchibu mite kawmin Zohnahthlak zawng zawng ban phunna Hnam Hnatlang atan thawkchhuak turin an sawm an ti a, a hmuna hnatlang thei lo te pawh hnatlang thawhlawm hmangin a hnatlan theih tih sawiin mimal, chhungkua, pawl, Kohhran emaw hnam chipeng hrang hrang anga thawh duh te tan a thawh theih dawn an ti a, a thawh te chu Zoram Thar Zofate Lairelna hminga citation pek an ni dawn tih an sawi bawk.

Zoram Thar Zofate Lairelna Inpui chuan Zofate Pathian Biak Inpui chu Krista leh hnama an inpumkhatna tur hmanrua bakah chanchintha hrilna tur hmunpui a nih avangin, rilru hmunkhat pua hnam hnatlang atan thawk chhuah turin mi tin te an sawm a ni.



BUDGET

Chakma autonomous district council (CADC)-a CEM chuan Ningani khan kumin tangka kum atana an council sum ruahman (budget) a pharh.

CADC tana 2025-2026 tangka kum sum hman tur ruahman cheng vaibelchhe 230 leh nuai 12 chuang chu CEM Pu Molin Kumar Chakma chuan a pharh a. Cheng vaibelchhe 220 leh nuai 67 chu sorkar tanpuina (grant-in-aid) atanga hmuh tur, hnathawk hlawh atana hman tura ruahman a ni a. Chhiah atanga hmuh tur cheng vaibelchhe 1 leh nuai 45 hisap a ni bawk. Council hnathawk hlawh tur ni lo, hnathawhna atana hman tura ruahman hi cheng vaibelchhe 1 leh nuai 45 chuang a ni. VC lawmman (hlawh) atan cheng nuai 67, sing 3 leh sang 6 hmu tura ruahman niin hmasawnna thawh na'n cheng nuai 77, sing 9 leh sang 8 ruahman a ni bawk a ni.

CADC inkhawmah hian tun hnai a boral EM Pu Sanjeev Chakma sunna hun hman a ni a. CEM-in sunna thu sawiin amah zahna lantir na'n ngawi reengin an ding bawk a ni. CADC budget pharh tak hi Thawhtanni-ah sawiho a ni ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



PRIME MINISTER

Prime Minister Narendra Modi chuan Saudi Arabia Lal Prince Mohammed Bin Salman in a sawm angin karleh Thawhlejni hian ni hnih cham turin Saudi Arabia a tlawh dawn.

Hemi chungchangah hian External Affairs Ministry chuan vawiin khan thuchhuah siamin Prime Minister Narendra Modi-a'n kum 2016 leh 2019-a Saudi Arabia a tlawh hnuin tun tum hi a vawi 3 tlawhna tur ani an ti a, Saudi Arabia Lal Prince Salman chuan kum 2023 September thla ah New Delhi tlawhin hetah hian G20 Summit-ah telin India leh Saudi Arabia thawhdunna tur hrang hrang an sawi dun tawh a ni.

India leh Saudi Arabia hian hun rei tak ata tawh inzawmna nghet tak an nei a, hnam kalphug mai bakah sumdawnna lamah inzawmna tha tak neiin hun tam tak anlo thawk dun tawh a, tun hnaiah venhimna lamah ram pahnihte hi kawng hrang hrangah an thawk a, Prime Minister Modi in a tlawh turah pawh hian thawhhona tura hmalakna hrang hrang an sawi tura rin a ni.



ARYABHATTA

India satellite hmasa ber, Aryabhata chu vawiin hian kum 50 a tling a, Kum 1975-a kahchhuah he satellite hmasa ber hi India Mathematician leh Astronomer, Aryabhata hming chawia phuah a ni.

Indian Space Research Organisation siam satellite hi USSR puihnain Kapustin Yar aṭangin kahchhuah a ni a, Hlawhtling taka kahchhuah anih avang hian India chu khawvela satellite orbit-a thawn chhuak thei ram 11-na atan pawm a ni.

